

ORDENANZA MUNICIPAL REGULADORA DA PROTECCIÓN DE CAMIÑOS E VÍAS DE TITULARIDADE MUNICIPAL CON MOTIVO DA EXECUCIÓN DE TALAS, DEPÓSITO, CARGA E TRANSPORTE DE MADEIRA NO TERMO MUNICIPAL DE MONFERO

1. PREÁMBULO

A actividade madeireira ten suma importancia no Concello de Monfero debido a que unha boa parte da superficie municipal está cuberta por especies forestais. Asemade, a industria de transformación deste sector tamén é moi importante para a economía do Concello debido aos postos de traballo que xera e á elaboración de produtos de alto valor engadido. Non obstante, é necesario implantar unha normativa que, sen diminuír os dereitos que todos gozan para transitar, evite o uso inadecuado ou desproporcionado dos mesmos e o conseguinte deterioro dos firmes.

O Concello, consciente da importancia do sector da madeira, pero tamén preocupado polos custos que esta actividade xera nas infraestruturas viarias locais, e polo tanto no conxunto da poboación, pretende garantir con esta ordenanza a conservación das vías públicas de titularidade municipal que poden verse afectadas polos labores de xestión forestal e ser obxecto de estragos por causa das operacións de corta e saca de madeira. Para estes efectos establécense unha serie de obrigas que lles afectan tanto ás empresas como ás persoas propietarias dos montes. Para levar o control das operacións forestais que se desenvolvan, o Concello requirirá a presentación dun escrito de comunicación previa para informar da realización de actividades extractivas de madeira, e dunha fianza, necesaria para cubrir os posibles estragos que se produzan nas infraestruturas e no dominio público local. Trátase, en definitiva, con esta ordenanza, de facer compatible a actividade de aproveitamento forestal coa preservación do medio natural, a protección paisaxística, a conservación dos camiños e a seguridade vial.

2. TÍTULO I: HABILITACIÓN NORMATIVA, OBXECTO E FUNDAMENTO

Artigo 1.–Habilitación normativa

Esta ordenanza dítase en virtude da potestade regulamentaria municipal recoñecida nos artigos 4.º 1.a) e 84 a) da Lei 7/1985, do 2 de abril, reguladora das bases de réxime local (LRBRL) e 6.1 a) e 286.1 a) da Lei 5/1997, do 22 de xullo, de administración local de Galicia (LALG), e na esfera das súas competencias, entre as que se atopa, a competencia en materia de infraestrutura viaria e de conservación de camiños e vías rurais segundo o establecido nos artigos 25.2 d) da LRBRL e no artigo 80.2 d) da Lei 5/97, do 22 de xullo, de administración local de Galicia (LALG).

Asemade, en canto as vías municipais son bens de dominio público, resulta de aplicación o disposto no artigo 3.1 do Real decreto 1372/1986, do 13 de xuño, que aproba o Regulamento de bens das entidades locais (RB).

A intervención a través de comunicación previa para a protección do dominio público viario e a regulación do procedemento de comunicación necesario e de verificación posterior fundaméntase nos artigos 39 bis e seguintes da Lei 39/2015, do 1 de outubro, do procedemento administrativo común.

A ordenanza regula tamén o réxime sancionador que resulta de aplicación, ao amparo do artigo 139 da LRBRL e o artigo 44.2 do RB.

Artigo 2.–Obxecto

O obxecto desta ordenanza é a protección e conservación dos camiños e vías públicas municipais, fronte aos danos e fallas que poden sufrir estes como consecuencia da corta e saca de madeira e usos equiparables dentro do termo municipal. Así, esta ordenanza afecta aos actos que teñan por obxecto a obtención de madeira e o seu transporte (operacións preparatorias de corta, desprazamento de vehículos e maquinaria, construción de ramplas de acceso aos terreos, depósitos e transporte de madeira etc).

Artigo 3.–Definicións

1. Actividade forestal: aos efectos desta ordenanza, considérase como actividade forestal aquela que se desenvolve a partir do aproveitamento múltiple dos recursos que proporcionan os terreos nos que vexetan especies arbóreas, sexan de nacemento ventureiro, de semente ou de plantación, sempre que non sexan características do cultivo agrícola.
2. Corta e saca de madeira: aos efectos desta ordenanza, por corta e saca de madeira deberá entenderse a totalidade das operacións que se desenvolvan dentro dos límites do Concello de Monfero que teñan por obxecto a obtención e transporte de madeira de corta, incluíndo tanto as operacións previas ou preparatorias á corta (desprazamento dos vehículos e a maquinaria, construción de ramplas ou accesos áos terreos etc) como as posteriores (preparación e depósito da madeira, carga e transporte).
3. Empresa madeireira: aos efectos desta ordenanza, por empresa madeireira debe entenderse a persoa física ou xurídica que realice os labores de preparación do terreo, repoboación, corta, saca, depósito e transporte da madeira. Tamén abrangue a aquelas persoas propietarias que realicen algúns destes labores nas parcelas da súa propiedade, sempre e cando non sexa para autoconsumo e teñan por destino a súa comercialización.
4. Camiño: aos efectos desta ordenanza, enténdense por camiño a vía de dominio e uso público municipal con capa de rodadura de terra ou zahorra, xeralmente para tráfico local.

5. Estrada: aos efectos desta ordenaza, enténdese por estrada as vías de dominio e uso público municipal asfaltadas, proxectadas e construídas para a circulación de vehículos.

Artigo 4.-Ámbito de aplicación

O ámbito de aplicación desta ordenanza é o termo municipal do Concello de Monfero, sen prexuízo das disposicións especiais que poidan rexer en zonas cualificadas como especialmente protexidas ou espazos naturais.

3. TÍTULO II: REXISTRO, AUTORIZACIÓN E RÉXIME XURÍDICO

Artigo 5.-Rexistro de empresas madeireiras

As persoas físicas ou xurídicas que realicen actividades madeireiras no Concello de Monfero deberán inscribirse nun Rexistro municipal establecido para controlar o desenvolvemento destas actividades, no que se fará constar a denominación da empresa, NIF, enderezo, teléfono, correo electrónico e persoa/s de contacto. Recóllese o modelo de solicitude de inscrición no Anexo I.

Artigo 6.- Requisitos para as operacións de corta e saca de madeira

1.-Para garantir a conservación dos camiños e estradas municipais e minimizar o risco de accidentes, antes de realizar os traballos de corta e saca de madeira en plantacións forestais deste Concello, será obrigatorio presentar nas oficinas do Rexistro municipal ou ben a través da sede electrónica do Concello ou en calquera dos lugares aos que se refire o artigo 41 da Lei 39/2015, do 1 de outubro, do procedemento administrativo común, utilizando o formulario normalizado dispoñible na sede electrónica municipal, un escrito de comunicación previa segundo os requisitos previstos nesta ordenanza. Isto farase sen prexuízo da necesaria obtención dos permisos ou autorizacións que, conforme á normativa vixente, sexan necesarios, xa foran da autoridade forestal, de conservación da natureza, de protección de augas, ou de preservación do patrimonio arqueolóxico.

2. O escrito de comunicación previa será asinado pola empresa madeireira, debendo constar nel os seguintes datos:

- Datos identificativos da empresa madeireira (denominación, número do NIF, enderezo e teléfono, nome e apelidos da persoa encargada ou responsable da empresa)
- Especie de madeira obxecto da corta
- Volume (ou peso) da madeira que se prevé extraer
- Nome das fincas ou montes afectados, con indicación do lugar e da parroquia
- Identificación catastral da fincas ou montes afectados (polígono e parcela/s)
- Datas previstas de inicio e remate dos traballos
- Lugar onde se depositará a madeira á espera da súa carga

- Fotocopia compulsada da solicitude ou do permiso, autorización ou licenza de corta expedido pola autoridade competente
- Fotocopia compulsada do seguro de responsabilidade civil ou calquera outro similar da empresa madeireira que cubra os eventuais danos e prexuízos que poidan causarse con ocasión da corta e saca de madeira, así como do último recibo pagado, acreditativo de que o dito seguro está vixente no momento de realizarse as ditas operacións.
- Xustificante do depósito de fianza, en base ao regulado no artigo 8 da presente ordenanza.

3.–Poderase presentar un escrito de comunicación previa para varios montes e/ou parcelas cando os traballos vaian realizarse simultaneamente. Neste caso, deberán constar no escrito de comunicación previa os seus datos identificativos e incorporar a correspondente ficha catastral.

4.–O Concello de Monfero terá a disposición das persoas interesadas un modelo normalizado de escrito de comunicación previa (ver modelo no Anexo II).

5.–Se o escrito de comunicación previa ou a documentación se presentase incompleta requiriráselle á persoa interesada, ao abeiro do disposto no artigo 69 da Lei 39/2015, do procedemento administrativo común (LPAC), para que no prazo de 10 días hábiles a complete, emende ou aclare, coa indicación de que, namentres, queda suspendido o procedemento. Advertiráselle, ademais, de que no caso de incumprimento ou defectuoso acatamento do requirimento ditarase resolución e terase por desistido da súa petición, logo da resolución que deberá ser ditada nos termos previstos na lei de procedemento.

6.–No caso de que se incumpra a obriga de presentar o escrito de comunicación previa establecida neste artigo, o Concello suspenderá os actos de saca de madeira que se estean realizando. Neste suposto, o Concello requirirá ao madeireiro o seu cumprimento, e outorgaralle o prazo que se considere oportuno en cada caso, sen que poida exceder dun mes. Cando o madeireiro non puidera ser identificado, serán responsables do cumprimento desta obriga os propietarios dos montes ou parcelas dos que se trate. O disposto neste apartado, enténdese sen prexuízo da imposición das sancións que correspondan polo incumprimento desta ordenanza, conforme ao establecido nela.

7.- Exceptuase de todo o descrito anteriormente, e, polo tanto, do disposto na presente ordenanza, a realización de cortas para usos propios domésticos, entendendo como tales os que non teñan fins comerciais.

8.–O Concello, excepcionalmente, poderá denegar ou limitar o acceso e/ou o depósito por calquera das vías ou zonas indicadas no escrito de comunicación previa, de forma motivada, tendo en conta o seu estado, a resistencia do seu firme, a súa situación, a súa utilización na data solicitada para outros fins ou calquera outra causa xustificada.

Artigo 7.–Obrigas

1.–A empresa madeireira estará obrigada a asumir os custes de reparación dos estragos producidos nos camiños e estradas municipais, nas estruturas anexas ou noutros elementos de dominio público local.

2.–A empresa madeireira queda obrigada á limpeza e retirada dos residuos da corta de madeira, de xeito que os camiños, estradas ou espazos públicos queden en todo momento no mesmo estado de limpeza e conservación que tiñan antes de levarse a cabo as operacións de corta e saca de madeira. A obriga de limpeza deberá cumprirse todos os días ao final da xornada de traballo.

3.–Os depósitos de rolla, pólas e demais restos non poderán invadir as zonas de circulación viaria, nin menoscabar a funcionalidade das gabias, taxejas, canalizacións, pontes ou calquera outra infraestrutura auxiliar ou anexa aos camiños ou estradas, de cara a evitar riscos para as persoas usuarias. A estes efectos prohibítese o depósito ou acopio de lotes de madeira nas zonas de dominio público e zona de dominio público adxacente das estradas e camiños de titularidade municipal.

4.–Prohibítese que os refugallos que non sexan estritamente vexetais queden ou se depositen no monte, vías ou lugares non autorizados. Os residuos asimilables aos urbanos seleccionaranse e depositaranse nos contedores municipais axeitados de acordo á súa composición. Os residuos industriais, especialmente os aceites usados, entregaranse a xestor autorizado.

5.–As empresas madeireiras e/ou as persoas propietarias dos montes tratarán os restos forestais de acordo co disposto na normativa sectorial de aplicación.

6.–A empresa madeireira estará obrigada a sinalizar as vías situadas nas zonas de extracción e depósito de madeira conforme ao establecido na normativa vixente en materia de tráfico, circulación e seguridade viaria.

7.–Prohibítese o uso das vías públicas para almacén ou depósito da madeira. Entenderase por depósito irregular, para os efectos desta ordenanza, aquel que exceda de 30 días naturais.

8.–A empresa madeireira ou o propietario forestal deberán derrubar e repoñer ao seu estado anterior as ramplas abertas para facilitar o acceso ao terreo ou ao monte, co obxecto de que, cando chova, a auga e a terra arrastrada non asolague e cause danos nas pistas ou camiños municipais.

9.–As limpezaas deberanse realizar nun prazo máximo de 72 horas a partir da retirada da madeira; as reparacións deberanse realizar no prazo máximo que para cada caso indiquen os servizos técnicos municipais; non obstante, de producírense alteracións

que imposibiliten o uso dos camiños e das estradas durante a corta e/ou a saca da madeira, deberanse realizar as reparacións, inmediatas e provisionais, que posibiliten o uso compatible das infraestruturas por persoas, animais ou maquinaria.

10. En caso de que o madeireiro incumpra algunha das obrigas contidas nos apartados anteriores, o Concello requirirao para o seu cumprimento, outorgándolle o prazo que se considere oportuno de forma proporcional e atendendo á obriga de que se trate en cada caso, sen que poida exceder dun mes con carácter máximo para ter completamente restituída a situación á obriga esixida. Cando o madeireiro non puidera ser identificado, serán responsables do cumprimento desas obrigas os propietarios dos montes ou parcelas das que se trate.

11.—O disposto no apartado anterior deste artigo, enténdese sen prexuízo da imposición das sancións que correspondan polos incumprimentos desta ordenanza, conforme ao establecido nela.

Artigo 8.- Fianza ou cota tributaria

1.—As empresas madeireiras deberán depositar unha fianza ou garantía a favor do Concello en calquera das formas previstas na Lei 9/2017, do 8 de novembro, de contratos do sector público, co obxecto de responder diante de posible danos non reparados voluntariamente. En ningún caso se poderán realizar as operacións de corta sen constituír previamente a fianza e tela depositada no Concello.

2.—Establécense dúas categorías a efectos de fixación de fianzas:

a) Corta de ata 200 toneladas: 3.000 euros

b) Corta de máis de 200 toneladas: 6.000 euros

O madeireiro que realice máis dunha corta dentro do termo municipal durante un ano, poderá optar polo depósito dunha fianza única anual, polo importe de 10.000,00 €, con suxeición ao procedemento previsto neste artigo. Sen prexuízo do anterior, o concello pode de oficio, esixir unha fianza adicional que resulte da suma das fianzas individuais anteriores (3.000 euros ou 6.000 euros adicionais segundo as toneladas por extracción) no caso de que a mesma madeireira solicite máis de 3 talas no mesmo ano. Podendo nese caso a fianza máxima esixida alcanzar os 16.000 euros por madeireira e ano.

No caso de que a mesma empresa madeireira vaia realizar, ao mesmo tempo, cortas en parcelas contiguas, o volume total de madeira extraída desas parcelas deberá sumarse, ós efectos do cálculo da fianza que se lle aplicará.

3.—O madeireiro deberá depositar a garantía na Tesourería municipal, con anterioridade á data prevista para comezar os traballos de saca de madeira.

4.—No caso de que se incumpra a obriga a que se refire o apartado anterior, o Concello suspenderá o procedemento e os actos de saca de madeira que, se é o caso, se estean realizando, e procederá de conformidade co establecido no artigo 7 apartados 10 e 11 desta ordenanza.

5.–Unha vez comunicado o remate dos traballos por parte da persoa interesada, a tramitación administrativa do expediente de devolución da fianza completarase nun prazo máximo de dous meses, unha vez que os servizos municipais comproben o cumprimento das obrigas das que a garantía debe responder.

6.–No caso de cumprimento das obrigas das que a garantía debe responder, o Concello devolverá a garantía, logo do informe técnico, no que quede reflectido que non se causaron danos nin fallas nas vías e infraestruturas públicas municipais e que as pistas, camiños ou espazos públicos utilizados se atopan en perfecto estado de conservación e limpeza una vez rematados os traballos

7.–En caso de incumprimento, o Concello procederá de conformidade co establecido nos apartados 10 e 11 do artigo 7 desta ordenanza e incautará a fianza durante o período que medie entre o requirimento e a total restitución da situación e a verificación municipal de telo feito. Transcorrido o prazo outorgado no requirimento, se este foi atendido, o Concello devolverá a garantía, logo do informe favorable dos servizos técnicos municipais. Transcorrido ese prazo sen que se dea cumprimento ao requirimento, o Concello acordará a realización dos traballos que sexan necesarios, por conta do obrigado, sobre o importe da fianza depositada.

8.–Cando as cantidades depositadas en concepto de fianza resulten insuficientes para sufragar os traballos mencionados no parágrafo anterior, recadarase a diferenza en concepto de ingreso de dereito público.

9.–O disposto no apartado 8.º deste artigo, enténdese sen prexuízo da imposición das sancións que correspondan polo incumprimento desta ordenanza.

10. –No caso de que nas operacións de depósito, carga e transporte interveña persoal e/ou maquinaria subcontratados pola persoa ou empresa responsable da tala que fíxese a comunicación previa, as súas responsabilidades para con o concello entenderanse subrogadas na fianza depositada e no caso de incumprimento incautárase nos mesmos termos que o indicado.

Artigo 9.–Prohibicións

O madeireiro encargado de realizar as operacións de saca da madeira deberá respectar as seguintes prohibicións:

1.-Iniciar os traballos de corta sen contar cos permisos e/ou autorizacións sectoriais correspondentes e/ou sen constituír a fianza esixida no artigo 8 desta ordenanza.

2.-Usar as vías públicas para almacén ou depósito da madeira. Os depósitos de rolla, ramas ou podalla non poderán invadir as zonas de circulación de vehículos e persoas, nin menoscar as infraestruturas anexas ás vías, nin supoñer un risco para as persoas usuarias da vía.

3.- Efectuar desprazamentos de terra que polas súas características deban ser considerados como movementos de terra.

4. TÍTULO III: INFRACCIÓNS E SANCIÓNS

Artigo 10.–Infraccións

1.–Son infraccións desta ordenanza os actos e omisións que contraveñan o establecido nela. A comisión de calquera infracción levará aparellada a imposición aos responsables das correspondentes sancións, ademais da obriga de indemnizar os prexudicados polos danos derivados da súa comisión.

2.–As infraccións cualifícanse en moi graves, graves e leves.

3.- Constitúen infraccións moi graves:

- Realizar calquera das actividades relacionadas coa saca de madeira sen o previo depósito da fianza no importe que corresponda.
- Non presentar, no prazo que se lle indique, o escrito de comunicación previa de realización dos traballos forestais, unha vez fose requirido polo Concello.
- Deixar as vías municipais nun estado de sucidade que supoña unha situación de risco para a seguridade viaria, segundo o informe municipal emitido para o caso.
- Ocultar ou falsear os datos ou a documentación esixida no artigo 5 desta ordenanza. Cando esta conduta veña referida á falta de solicitude de autorización, notificación previa ou comunicación para a execución de aproveitamentos forestais que esixe o Decreto 50/2014, do 10 de abril, polo que se regulan os aproveitamentos madeireiros e leñosos, de cortiza, de pastos e micolóxicos en montes ou terreos forestais de xestión privada na Comunidade Autónoma de Galicia e o contido, organización e funcionamento do Rexistro de Empresas do Sector Forestal, darase traslado ao órgano autonómico competente para o exercicio, no seu caso, da potestade sancionadora.
- Causar danos nas estradas, pistas, camiños ou noutros elementos do dominio público local por valor superior a 6.000,00 €
- Cometer, nun prazo dun ano, dúas faltas graves firmes na vía administrativa

4. Son infraccións graves:

- Non presentar o escrito de comunicación previa, aínda que o achegue despois de ser requirido polo Concello
- Deixar as vías municipais en deficiente estado de sucidade, segundo o informe municipal emitido para o caso
- Causar danos nas estradas, pistas, camiños ou noutros elementos do dominio público local por valor inferior a 6.000,00 €
- Non demoler ou non repor ao seu estado orixinal as ramplas ou accesos que se abridan para acceso aos terreos forestais
- Cometer, nun prazo dun ano, dúas faltas leves, firmes na vía administrativa

5. Considéranse infraccións leves calquera outro incumprimento desta ordenanza que non estea cualificado como moi grave ou grave e cuxa sanción corresponda ao Concello

Artigo 11.–Sancións

1.–As infraccións desta ordenanza serán sancionadas coas seguintes multas:

- Infraccións leves: multa de ata 750 euros
- Infraccións graves: multa de contía comprendida entre 750,01 e 1.500,00 euros
- Infraccións moi graves: multa de contía entre 1.500,01 € e 3.000,00 euros

2. A imposición das sancións requirirá a tramitación do correspondente procedemento , de conformidade co disposto na lei 39/2015, de 1 de outubro

3. O importe das multas será graduado tendo en conta as circunstancias concorrentes e de acordo co establecido na normativa vixente.

4. As multas e sancións impostas ao amparo da presente ordenanza reduciranse na súa contía nun 50% no caso de seren aboadas no prazo de 15 días a partir da notificación da multa ou sanción, e se a persoa infractora mostra por escrito a súa conformidade con estas, e renuncia expresamente ao exercicio de toda acción de impugnación no citado prazo.

5. O pagamento das multas poderase esixir pola vía administrativa de constrinximento, sen prexuízo da esixencia, se for o caso, das correspondentes responsabilidades civís e penais.

6. As sancións serán independentes da reparación do dano causado e da indemnización de danos e perdas a que houber lugar.

7. A resolución do expediente sancionador corresponderá á Alcaldía.

Artigo 12.– Responsables

1.–A empresa madeireira será responsable directamente de todos os danos e perdas a persoas e bens que se produzan ou ocasionen con motivo da corta, depósito e transporte da madeira, e debe reparar o dano causado. O Concello de Monfero velará especialmente para que as ditas operacións de corta e saca de madeira non ocasionen danos nas vías públicas municipais e estas queden nun estado axeitado de conservación, limpeza e seguridade.

2.–A obriga recollida no punto anterior será esixible non só polos actos ou omisións propios, senón tamén polos cometidos por calquera persoa que, sen ser empregada ou traballadora da empresa madeireira, interveña nas operacións de corta, saca e

transporte por conta, consentimento ou aquiescencia da empresa madeireira e, en xeral, polos cometidos por aquelas persoas de quen deba responder.

3.–Os propietarios das parcelas de monte nas que se efectúen actividades de extracción de madeira serán responsables nomeadamente cando a corta se faga a feito en zonas con pendentes elevadas, de tomar as medidas precisas para previr tanto os risos erosivos sobre o terreo como as posibles consecuencias da erosión sobre os bens públicos.

DISPOSICIÓNS DERRADEIRAS

Primeira.– En cumprimento do disposto no artigo 70.2 da LRBRL, esta ordenanza entrará en vigor unha vez que se publique o seu texto integramente no Boletín Oficial da Provincia e transcorra o prazo de quince días hábiles previsto no artigo 66.2 do citado texto legal.

Segunda.–A Alcaldía queda facultada para ditar cantas ordes ou instrucións resulten necesarias para a adecuada interpretación, desenvolvemento e aplicación desta ordenanza.

ANEXO I: SOLICITUDE DE INSCRICIÓN NO REXISTRO DE EMPRESAS MADEIREIRAS DO CONCELLO DE MONFERO

A empresa que se indica na táboa adxunta solicita a súa inclusión no REXISTRO MUNICIPAL DE EMPRESAS MADEIREIRAS DO CONCELLO DE MONFERO

DATOS DA EMPRESA MADEIREIRA	
Denominación	
NIF	
Enderezo	
Teléfono fixo	
Teléfono móbil	
Correo electrónico	
Persoas de contacto	

O representante legal, asinante, declara responsablemente ser certos os datos que se consignan na táboa e se compromete a manter os mesmos actualizados ante calquera cambio ou modificación que resulte.

Monfero, _____ de _____ de 20 _____

Asdo.:

Nome:

Representante da empresa

ANEXO II. COMUNICACIÓN PREVIA DAS OPERACIÓNS DE CORTA E SACA DE MADEIRA

DATOS DA EMPRESA MADEIREIRA

Denominación

NIF

Enderezo

Teléfono fixo

Teléfono móbil

Correo electrónico

Persoas de contacto

DATOS DA PROPIEDAD FORESTAL

Especie de madeira obxecto da
corta

Volume total da madeira a
extraer (Toneladas)

Nome das fincas ou montes
afectados, lugar ou sitio e
parroquia

Nome e apelidos do titular dos
terreos

Referencia catastral

Identificacións catastrais

Polígono

Parcela

Datos do aproveitamento
forestal

Data prevista de inicio

Data prevista de remate

Vehículos adscritos á
actividade, indicando marca,
modelo, matrícula e PMA.

Lugar onde se depositará a
madeira

En aplicación da ordenanza municipal reguladora da protección de camiños e vías de titularidade municipal con motivo da execución de talas, depósito, carga e transporte de madeira no termo municipal de Monfero, comunico o inicio de actividades forestais nas parcelas indicadas previamente.

Documentación de presentación obrigatoria

- o Fotocopia compulsada da solicitude ou do permiso, autorización ou licenza de corta
- o Fotocopia compulsada da fianza ou aval bancario

Monfero, _____ de _____ de 20____